

Vom Christlichen Leben.

Dir sey Gott Vater Lob vnd Ehr/ Vnd dir O Christe lieber Herr/ du gbenedeyter Samen. Vnd dir O heiliger Geist zugleich/ auff Erden/ vnd im Himmelreich/ zu ewigen zeiten/ Amen.

Gebet.

Dimlicher Vater/ Mein Gott/ sihe mich an/ vnd erbarm dich mein/ eile mir zu helffen/ das ich zu dieser stunde anhebe zu fliehen das vbel/ vnd zu thun/ was gut ist für deinen Augen/ gib mir den rechten wahren Glauben/ Liebe vnd Hoffnung in dich/ vnd in Jesum Christum deinen eingebornen Sohn / das ich denselben erkenne/ vnd glaube/ das er mir zur Weisheit/ Gerechtigkeit/ Heiligkeit vnd Erlösung gegeben/ das er sey mein Versöhner / Mittler vnd gnugthuung. Gib das ich nachfolge seinen Fusstapffen/ vnd lebe nach seinem Wort/ vnd Gottlichen Geboten/ mir selbst teglich sterbe/ mein selbst verleugne / das Creutze der Buß mit gedult aus Liebe auff mich neme/ vnd trage. Mein Nächsten lieb habe / vnd guthue/ wie mir Christus gethan hat/ vnd mich mit höchsten vleys hütete/ vor allem/ damit ich meinen Gott beleidigen möchte. O Jesu mein Erlöser vnd Seligmacher/ stercke mich durch deinen heiligen. Geist in solchem Streit vnd Kampff/ ob ich gleich verwundet liegen oder fallen würde/ das du durch deine Barmhertzigkeit vorkomen wollest. Las mich nur von dir nicht weichen/ dein nicht verleugnen / so wird mir nichts zum Tode schedlich sein/ Gib mir in meiner letzten stunde/ anzuruffen deinen heiligen Namen/ vnd mein trost vnd hoffnung zusetzen in das Verdienst deines bitteren Leidens vnd sterbens/ welches ich setze zwischen mich vnd deinem Gerichte / Di

Jesu dein bin ich/ mach mich selig durch dein
Barmhertzigkeit/
Amen.

Vom